

Headline	Bertemu jodoh di internet
Date	30. Mar 2008
Media Title	Berita Minggu
Section	Dimensi
Circulation	342946
Readership	2476000
Language	MALAY
Page No	8
Article Size	607 cm²
Frequency	Daily
Color	Full Color



Bertemu jodoh di internet

Perkenalan
di Tagged.
com
lahirkan
bibit cinta
Irfan dan
Idura

JODOH ada di mana-mana', melalui internet juga individu boleh mendapat pasangan. Bukan sekadar teman di kala sunyi malah teman sehidup dan semati. Sehingga kini MIRC, Yahoo Messenger, Friendster dan My Space adalah antara ribuan ruang siber untuk berkomunikasi, berkenalan serta bertukar pendapat. Namun ada juga yang memilih ruangan ini untuk mencari jodoh.

Sukar untuk ditafsir, walau tidak pernah bersua muka, cukup hanya berkenalan di alam maya, perasaan kasih dan sayang ada kalanya melebihilah mereka yang berada di hadapan mata. Mungkin ramai yang kurang percaya jodoh menerusi internet ini, tetapi masih ada yang berpendapat internet adalah satu daripada cara seseorang bertemu jodoh.

Antara mereka yang berkenalan dan bertemu jodoh di internet ialah Munir Irfan Ramlee, 27, seorang ahli perniagaan dan pasangannya, Nur Izatul Idura Mohd Jamil, 26, Setiausaha Fakulti Pendidikan di Universiti Putra Malaysia (UPM).

Kisah percintaan istimewa mereka diungkap dalam rancangan Keluarga Di 9 (KD9) menerusi slot Kongsi Rasa Kongsi Rahsia yang dihoskan Nora.

Bibit percintaan pasangan dua sejoli ini bermula ketika mereka berkenalan menerusi Tagged.com pada Februari 2007. Perasaan saling merindu dan tidak cukup hanya foto menjadi tatapan, membuatkan mereka mengambil keputusan untuk bertemu kali pertama di tempat kelahiran Idura, iaitu Pulau Pinang pada 30 Mac tahun sama.

Kebetulan rakan Irfan melangsgung perkahwinannya di negeri itu. Sebagai membuktikan keikhlasannya ingin



IRFAN dan Idura (tengah) ketika ditemu bual Nora dalam rancangan Keluarga Di 9, baru-baru ini.

berkawan dengan Idura, Irfan bertemu dengan keluarga gadis idamannya itu. Mereka saling berkenalan dan Irfan mengambil keputusan untuk mengikat tali pertunungan pada 1 September 2007 dengan restu keluarga kedua-dua belah pihak.

Tidak mahu melengahkan perkara baik, mereka selamat disatukan pada 9 Februari lalu dan mengadakan majlis sambut menantu di rumah sebelah keluarga pihak lelaki di Bagan Datoh, Perak pada 15 Mac lalu.

Mengimbas percintaan mereka menerusi internet, seperti ada keserasian antara mereka, Idura yang agak sukar memberi nombor telefonnya kepada orang yang tidak dikenali, begitu

mudah memberikannya kepada Irfan walaupun kali pertama menghulurkan salam perkenalan.

Percaya cinta menerusi internet, pasangan ini berharap kebahagiaan rumah tangga mereka kekal hingga ke akhir hayat. Nasihat mereka kepada yang bercinta menerusi internet supaya berhati-hati dan ikhlas dalam menjalin hubungan.

Pensyarah di Darul Quran Jakim, Kuala Kubu Baru, Mohd Zamri Mohd Zainuldin yang ditanya mengenai kesahihan jodoh di internet, berkata ia adalah satu cara untuk berhubung pada zaman moden ini, berbanding sebelum ini hanya gunakan surat dan khidmat orang tengah untuk berkomunikasi.

"Islam tidak melarang kita menggunakan teknologi dalam mengerakkan hubungan silaturahim, namun perlu mengelakkkan percintaan itu daripada menghampiri zina."

"Mencari jodoh menerusi internet juga tidak salah, tetapi untuk mencari yang jujur agak susah. Jadi untuk mencari pasangan hidup kita perlu berjumpa untuk mengenal secara realiti kerana kita akan hidup bersama bukan untuk sehari dua."

"Seperti cerita pada zaman Rasulullah, seorang sahabat hanya bertawakal untuk berkahwin tanpa mahu melihat dahulu pasangannya, namun keeesokan harinya, sahabat itu berjumpa Rasulullah lalu menyatakan rasa

kesalnya tidak melihat pasangan itu terlebih dahulu kerana isterinya seorang yang pendek dan hitam," katanya.

Justeru, apabila menyentuh soal jodoh, katanya seseorang itu perlu berhati-hati dan mencari pasangan bukan sekadar rupa tetapi yang lebih penting peganagn agamanya supaya rumah tangga aman dan bahagia.

KD9 adalah rancangan bual bicara yang memaparkan isu kekeluargaan dan kemasyarakatan meliputi empat slot iaitu Siapa Kata (Isnin), Jiwa Raga (Selasa), Dua Generasi (Rabu) dan Kongsi Rasa Kongsi Rahsia (Khamis) disiarkan secara langsung setiap jam 1 hingga 2 petang.